

無盡意菩薩經

第四

百一
周十一

47784
5



元祿九年丙子二月日重脩

皇國聖業 固 帝 齋 綴 昌

佛日增輝 懋 輪 常 轉

山城州天安寺法金剛院置

法

無盡意菩薩經卷第四

周

宋涼州沙門智嚴共寶雲譯

復次舍利弗菩薩摩訶薩修集助道功德智
慧亦不可盡云何修集功德無盡若布施持
戒心所修集發行慈悲自所有罪發露懺悔
亦代衆生發露懺悔已行懺悔次當隨喜一
切衆生學無學人及辟支佛發心菩薩已背
行者堅住不退一生補處如是諸人於三世
中所集功德當以一心隨其歡喜復於過去
未來現在諸佛世尊所有善根生隨喜心是
隨喜菩薩悉當成就如是功德隨喜已訖次
當勸請十方世界一切諸佛始成道者請轉

法輪示涅槃者常住於世及請一切菩薩聖
人常為衆生住世說法如是善根如菩提想
悉以迴向無上菩提是菩薩未發心者勸令
發心已發心者為說諸度有貧窮者救攝以
財病施醫藥隨時瞻療無勢力者勸行忍辱
有犯禁者令不覆藏已覆藏者勸令發露現
在諸佛及涅槃者悉皆發心供養恭敬敬重
師長如佛世尊若求法時沒命不懈於此法
寶生無價想於說法者生諸佛想為聽法故
過百由旬心方勇銳無疲勞想凡所講說不
為利養於父母所知恩報恩供養給事心初
無悔所作功德常無厭足護身口意令無諂

曲建立佛塔所得功德等於梵天勸請之福
具足諸相開門大施故得隨形好修諸善根
故莊嚴身者無憍慢故莊嚴口者離口過故
莊嚴意者不住法故莊嚴佛土者神通教化
故莊嚴法者離諸欲故莊嚴大眾者不兩舌
惡口破壞他故於受法者如實說故說法歡
喜稱讚善哉所作功業不唐捐故離覆蓋者
往聽法故莊嚴菩提樹者以妙園林奉施佛
故莊嚴道場者成就一切諸善根故出生清
淨者不爲煩惱所染汙故得寶手者能捨一
切所重物故得無盡者無量寶藏以布施故
見者歡喜常和悅故體得法性者心慧光明

等照衆生故莊嚴光明者不輕未學善誘導
故生生清淨者持戒功德悉成就故處胎清
淨者不見他罪故生人天者淨行十善故慧
明獨步者所可教化不生分別故於法自在
者所愛重法無憊惜故世中獨勝者畢竟清
淨故微妙解脫者不求少分行故行一切功
德者不捨一切智心故七財滿具者信爲根
本故攝取正法者不惜身命故不誑世間者
具本誓願故具足一切佛法者諸善根本本
已行故舍利弗是名略說菩薩功德若廣說
者若經一劫若過一劫不可得盡云何菩薩
智慧無盡若一一因聞說智慧若一一緣得

於智慧云何爲因內增上欲云何爲緣外勤
求法如是因緣依佛智慧非依聲聞緣覺智
慧親近智者心無憍慢常於其人起世尊想
是諸智者知受法人心已柔和爲說智慧教
令依止隨其正器說無染法聽法之人於是
法中勤修聚集助法精進是爲智慧云何菩
薩助法精進若無希求簡絕事務省少語言
於諸所欲心常知足初夜後夜減損睡眠凡
所聞義能善思惟籌量分別數求善法心無
愛濁除諸陰蓋無有障蔽所犯過失尋能除
滅正行堅固趣向傾仰尊敬法行具精進行
求法不懈如救頭然無有我行不遲緩行不

捨本行心增上行呵衆鬧行愛樂獨行向阿
蘭若處思惟行聖種知足行不動頭陀行欣
樂法行不思惟世間言語行求出世間法行
不失正念行發諸法義行真正道行知緣摠
持行慚媿莊嚴行智慧堅牢行除無明網纏
結繫縛淨慧明行善覺了行廣覺了行不滅
覺行分拈覺行現在知行不從他功德行不
自恃功德行讚歎他人諸功德行善修作業
行因果不動行知清淨業行舍利弗是名助
法精進復次舍利弗菩薩摩訶薩有四種施
具足智慧何等爲四一者以紙筆墨施與法
師令書寫經二者種種校飾莊嚴妙座以施

法師三者以諸所須供養之具奉上法師四者無諂曲心讚歎法師舍利弗是名菩薩四種布施具足智慧菩薩復有四持禁戒具足智慧何等為四一者持戒常演說法二者持戒常勤求法三者持戒正分別法四者持戒迴向菩提是名菩薩四種持戒具足智慧菩薩復有四種忍辱具足智慧何等為四一者於求法時忍他惡罵二者於求法時不避飢渴寒熱風雨三者於求法時隨順和上阿闍梨行四者於求法時能忍空無相無願舍利弗是名菩薩四種忍辱具足智慧菩薩復有四種精進具足智慧何等為四一者勤於多聞

二者勤於摠持三者勤於樂說四者勤於正行
舍利弗是名菩薩四種精進具足智慧菩薩復
有四種禪定具足智慧何等為四一者常樂獨
處二者常樂一心三者求禪及通四者求無礙
解智舍利弗是名菩薩四種禪定具足智慧
菩薩復有四種智慧具足智慧何等為四一
者不住斷見二者不入常見三者了十二緣
四者忍無我行舍利弗是名菩薩修行四慧
具足智慧菩薩復有四擁護法具足智慧何
等為四一者擁護法師如已君主二者護諸
善根三者將護世間四者護利益他舍利弗
是名菩薩四擁護法具足智慧菩薩復有四

滿足法具足智慧何等為四一者說法滿足
二者智慧滿足三者利養滿足四者諸法滿
足舍利弗是名菩薩四滿足法具足智慧菩
薩復有四力具足智慧何等為四一者精進
力求於多聞得解脫故二者念力菩提之心
不忘失故三者定力等無分別故四者慧力
修多聞故是名四力具足智慧復有四方便
具足智慧何等為四一者隨世所行二者隨
衆生行三者隨諸法行四者隨智慧行是名
四方便具足智慧菩薩復有四道具足智慧
何等為四一者諸波羅蜜道二者助菩提道
三者行八聖道四者求一切智慧道是名四

道具足智慧菩薩復有四無厭足行具足智
慧何等爲四一者樂於多聞無有厭足二者
樂於說法無有厭足三者行慧無厭四者行
智無厭是名菩薩四無厭足具足智慧復次
助智慧者隨一切衆生心行隨一切法行隨
布施行隨持戒忍辱精進禪定智慧行隨慈
悲喜捨行得具智慧何以故如諸菩薩所發
起行皆以智慧而爲根本智慧成已還依止
智是菩薩安住於智依一切智諸魔眷屬不
能留難是故能得具一切智舍利弗是名菩
薩助智無盡

復次舍利弗菩薩摩訶薩四念處亦不可盡

是菩薩觀身修身行見過去未來現在諸身
顛倒和合如外草木墻壁瓦石從因緣有不
可長養無所繫屬此身如是從因緣生不可
長養無所繫屬是陰界入中我我所空常無
常空是身無我無有所是身不堅不可依
怙當求菩提正覺之身云何菩提正覺之身
所謂法身金剛之身不可壞身堅牢身出三
界身我身雖有無量過患願當除滅成如來
身是菩薩所以堪忍久處四大諸結焦然皆
為利益諸衆生故如外四大地水火風種種
門種種所作種種形貌種種器物種種所用
皆為利益一切衆生我今此身為利衆生亦

復如是菩薩摩訶薩見如是利益已觀身衆
苦不生厭離觀身無常不厭生死觀身無我
不捨教化觀身寂滅不隨於捨是菩薩觀內
身時不生煩惱觀於外身亦復如是是菩薩
離黑汙身成白淨身業具足妙相以自莊嚴
於天人中多所利益是名菩薩觀身修身行
云何菩薩觀受修受行菩薩如是思惟諸受
一切皆空善分別受智慧籌量知受寂滅若
受樂時不貪所欲若受苦時觀三惡道起大
悲心不生瞋恚若受不苦不樂時不起愚癡
是菩薩正念受處如其所受若苦若樂不苦
不樂於是諸受知出知修觀諸衆生受寂滅

莊嚴是諸衆生於諸受中不知出修若受樂
時生於貪著若受苦時便生瞋恚若受不苦
不樂時便生愚癡我今要當進修智慧除一
切受發諸善根起大悲心攝取智慧亦為衆
生除斷諸受而為說法未解受者受苦解受
者受樂云何解受者所謂無受者無我人衆

生壽命養育士夫除攝取受者攝者受取者
受受者受有者受顛倒者受分別者受諸見
者受眼相者受耳鼻舌身意相者受色想者
受聲香味觸法想者受眼緣色生觸受苦受
樂受不苦不樂受耳聲鼻香舌味身觸心緣
法生觸受苦受樂受不苦不樂是名為受復

有一受心意覺了復有二受內受外受復有三受過去未來現在受復有四受覺了四大復有五受思惟五陰復有六受分別六入復有七受七識住處復有八受八邪法也復有九受九衆生居處復有十受十不善法舍利弗舉要言之無量衆生諸受思惟所緣境界一切名受菩薩於中修受觀行起大智慧知諸衆生善不善受生住滅相舍利弗是名菩薩正受念處而不可盡

云何菩薩觀心念處菩提之心不忘不失正念不亂如是觀心心生已滅無有住相不於內住不從外來我初所發菩提心者是心已

盡過去變異不至方所不可宣說無有住處
若心所集諸善根等亦是過去盡滅變異不
至方所不可宣說無有住處若心善根迴向
阿耨多羅三藐三菩提是亦滅盡變異之法
不至方所不可宣說無有住處心不知心心
不見心心不生心我以何心成阿耨多羅三
藐三菩提是菩提心不與善根心合善根心
不與迴向心合迴向心不與菩提心合若菩
薩作是觀時不驚不怖是名菩薩勤精進也
又復思惟觀察甚深十二因緣不失因果知
是心性屬衆因緣不可長養無作無繫一切
諸法亦復如是如法修行如所莊嚴我今當

勤修集莊嚴不離心性云何心性云何莊嚴
心性者猶如幻化無生無作無有施設莊嚴
者所作布施悉以迴向嚴淨佛土心性者如
夢所見心相寂滅莊嚴者具足持戒修集諸
通心性者如鏡中像其相清淨莊嚴者所修
忍辱悉以迴向無生法忍心性者如熱時燄
究竟寂滅莊嚴者於一切善深發精進迴向
具足無上佛法心性者無色無對無所爲作
莊嚴者一切所修禪定解脫三摩跋提具足
迴向佛之禪定心性者不可得見亦不可取
莊嚴者於一切問難善能分別迴向具足佛
之智慧心性者無緣不生莊嚴者常觀善根

心性者無因不生莊嚴者因助菩提而發起
心心性者捨離六塵心則無起莊嚴者入佛
境界如是菩薩觀是心行繫念神通得神通
已能知一切衆生諸心既知心已如其心量
而為說法又觀心行繫念大悲教化衆生無
有厭倦又觀心行不起盡滅變異之相不捨
生死相續煩惱正念是心知無生起成正決
定如是行者不隨聲聞辟支佛地極是心勢
以一念智成阿耨多羅三藐三菩提舍利弗
是名菩薩正心念處而不可盡舍利弗云何
菩薩觀法念處常以慧眼見一切法至坐道
場未曾中失是菩薩當觀法時不見一法乃

至微相離空無相無願無作無生無滅無物
亦不見一法乃至微相入十二緣者菩薩觀
法見諸非法無不是法云何為法謂無我義
無衆生義無壽命義無人義是名為法云何
非法謂我見衆生見壽命見人見斷見常見
有見無見是名非法復次一切法是法一切
法是非法何以故觀空無相無願是名一切
法是法我慢憍慢我及我所攝取諸見是名
一切法非法是菩薩觀法時不見有法非菩
提因出世道因是菩薩知一切法悉是出世
得無礙大悲觀一切法煩惱結縛如幻化相
知是諸法非有煩惱非無煩惱何以故了諸

法義無有二性是諸煩惱無隱藏處無有聚集若解煩惱即解菩提如煩惱性即菩提性是菩薩安住正念無有一法可作分別無諸障礙善能解了正住法性如住法性即住眾生性如住眾生性即住虛空性如住虛空性即住一切法性菩薩觀法時依於佛法解一切法即是佛法其心介時不生盡智無為雖盡而亦不盡入無生智亦觀眾生不捨假名法念處者安住正念一切諸法所謂聲聞緣覺菩薩正覺所知一切假名諸法盡未來際終不忘失又法念處者說無量行親近佛法壞諸魔衆得自然智舍利弗是名菩薩正法

念處而不可盡

復次舍利弗菩薩摩訶薩四正勤亦不可盡
何等為四若未生惡不善法不生故生欲勤
精進攝心正除已生惡不善法為斷故生欲
勤精進攝心正除未生善法為生故生欲勤
精進攝心正除已生善法安住修集為增廣
不失故生欲勤精進攝心正除未生惡不善
法為不生故生欲勤精進所謂欲者善思惟
也勤精進者不捨善思惟也攝心正除者觀
善思惟也何以故善思惟時惡不善法不令
入心云何惡不善法惡不善法非戒聚伴非
禪定伴非智慧伴云何非戒聚伴若破重戒

及毀餘戒是名非戒聚伴云何非定聚伴若
毀威儀及餘亂心法是非定聚伴云何非智
慧伴若攝取諸見及餘見障礙是非智慧伴
是名惡不善法善思惟時如是等惡法不令
入心是名初正勤已生惡不善法爲斷故生
欲勤精進攝心正除如上所說惡不善法心
不聚集無有方所無有住處是不善法心行
斷故已覺了故從緣生故淨故生欲礙故生
恚無明緣故生於愚癡是善思惟觀不淨時
滅於欲心修集慈心滅於瞋恚觀十二因緣
滅於愚癡如是煩惱永寂滅者即是除斷一
切假名亦復不見有可斷者是名第二正勤

未生善法爲生故生欲勤精進攝心正除是
諸善法說有無量何以故無量善法菩薩修
集於是法中欲爲根本勤進修集攝心者出
過善法正除者在在處處常在善法是名第
三正勤已生善法安住修集爲增廣不失故
攝心正住是諸善根悉已迴向阿耨多羅三
藐三菩提何以故善根迴向無上菩提者則
不可盡所以者何如是善根不依三界若依
三界是則損耗是故迴向一切種智諸善根
等不可得盡是名第四正勤舍利弗是名菩
薩修四正勤不可窮盡

復次舍利弗菩薩摩訶薩四如意分亦不可

盡何等爲四欲進心思惟如是四法以慈悲
喜捨而爲根本是四無量心常親近常親近
故心得調柔心調柔故得入初禪第二禪第
三禪第四禪入諸禪故身得輕軟成就如是
身輕心柔入如意分善入如意分已即生神
通若欲若進若心若思惟欲者專向彼法精
進者成就彼法心者觀察彼法思惟者彼法
方便是如意分已具足故能得神通欲者莊
嚴進者成就心者正任思惟者能善分別是
菩薩得如意分隨其所解如其所作心得自
在隨意所往善作諸業畢竟成就一切本行
如風行空無所罣礙舍利弗是名菩薩四如

意分不可窮盡

復次舍利弗菩薩摩訶薩五根亦不可盡何等爲五信根進根念根定根慧根云何信根信於四法何等四於生死中行世正見信於業報乃至失命終不作惡信菩薩行不隨諸見專求菩提不求餘乘信解諸法同空無相無願之法同第一義同於了義甚深因緣無我衆生無有分別信一切佛十力四無所畏十八不共法如是信已消除疑網修集佛法是名信根何等進根若法信根所攝是法卽爲進根所修是名進根云何念根若法進根所修是法終不忘失是名念根云何定根若

法念根所攝是法不忘不失一心不亂是名
定根云何慧根若法定根所攝是慧所觀是
慧體性內自照了不從他知自任正行是名
慧根是五根者共相續生具一切法得受記
別譬如外道五神通仙不能定知胎中差別
男女相現然後乃知多有菩薩無信等根諸
佛世尊不為授記若成就者便與授記舍利
弗是名菩薩五根無盡

復次舍利弗菩薩五力亦不可盡何等為五
信力進力念力定力慧力云何信力是信一
向不可沮壞乃至天魔變為佛身示現出入
禪定解脫不能傾動菩薩信力是名信力云

何進力菩薩精進於諸善法得堅固力如所得力修諸禪定諸天及人所不能壞如本所願皆悉成就是名進力云何念力菩薩任諸善法不為煩惱之所破壞何以故是菩薩正念之力能摧伏故如是念力無能壞者是名念力云何定力遠離慣鬧常樂獨行是菩薩雖有所說言語音聲不礙初禪善住覺觀不礙二禪心生歡喜不礙三禪是菩薩雖樂化衆生不捨佛法而亦不礙於第四禪是菩薩行四禪時諸妨定法無能為也菩薩念時不捨於定亦不隨定而能自在處處往生是名定力云何慧力是菩薩知世間法出世間法

無有一法能壞是智菩薩在在所生之處一切伎藝不從師受悉自然知世間外道苦行難行是菩薩爲教化故亦悉現受同其所行是出世法能過世者慧力成就故諸天及人所不能伏是名慧力舍利弗是名菩薩五力無盡復次舍利弗菩薩摩訶薩七覺分亦不可盡何等爲七念覺分擇法覺分精進覺分喜覺分除覺分定覺分捨覺分云何念覺分若念覺分能觀於法能分別法撰集思智亦能觀察諸法自相何等自相觀一切法自性皆空念如是等令其覺了是名念覺分云何擇法覺分若能分別曉了八萬四千法聚如所了法

了義是了義不了義是不了義世諦是世諦
第一義諦是第一義諦假名是假名正了無
疑是正了無疑如是等法分別選擇是名擇
法覺分云何進覺分若念法擇法喜法除法
定法捨法以智攝取精進勇猛欲不退轉勤
修力勵不捨本意行於正道是名進覺分云
何喜覺分所修法喜於無量法心生悅豫無
有懈怠清淨樂法是喜踊躍能除身心捨諸
煩惱是名喜覺分云何除覺分若除身心及
諸煩惱離於覆蓋入定境界令心正住是名
除覺分云何定覺分如所入定悉能覺了非
不入定是覺了法又了諸見煩惱結縛無始

無終其心平等一切諸法無別異相能覺如
是諸法等者是名定覺分云何捨覺分若法
憂喜其心不沒亦復不為世法所牽無高無
下正住不動無有諸漏無喜無著無諸障礙
正直隨順真諦正道是名捨覺分舍利弗是
名菩薩七覺分亦不可盡

復次舍利弗菩薩摩訶薩八聖道分亦不可
盡何等為八正見正思惟正語正業正命正
精進正念正定云何正見若見出世不起我
見衆生壽命養育士夫斷見常見有見無見
亦復不起善以不善無記等見乃至不起生
死涅槃二相之見是名正見云何正思惟若

思能起貪欲瞋癡諸煩惱等是不名正是正
思惟不思不起如是等事惟思戒定智慧解
脫解脫知見是正思惟能思如是任戒等聚
如是思惟名正思惟云何正語凡所演說不
令其身而有焦惱亦不損他成就如是善妙
好語趣於正道是名正語云何正業若業黑
有黑報白有白報黑白有黑白報終不敢作
若業非黑非白有非黑非白報若業能盡業
是業必作是菩薩所依止業勤修如是諸正
業等是名正業云何正命若不捨聖種頭陀
威儀不動不轉無諸姦諂不爲世間利養所
牽易養易滿常自堅持威儀禮節見他得利

心不生熱於己利養常知止足如是正行聖人所讚是名正命云何正進若進向邪非聖所讚所謂貪婬瞋恚愚癡煩惱是正精進終不爲之若法能入正諦聖道寂滅涅槃攀緣正路是正精進修集勤行是名正進云何正念若念不失不動於法正直不曲見生死過進向涅槃繫心不忘不失正道是名正念云何正定若定不亂於一切法是菩薩如是任時成正決定是名正定菩薩任是三昧爲一切衆生得解脫故成正決定是名正定是八聖道悉是過去未來現在諸佛之道是菩薩覺了已演說開示分別顯現成就佛道舍利

弗是名菩薩八聖道分亦不可盡

復次舍利弗菩薩摩訶薩修行定慧亦不可盡云何爲定若心寂靜正寂靜寂滅不然心常不亂守護諸根不動不轉無有卒暴安詳靜默堅持不失善調柔軟獨處閑靜其身遠離心不迴轉思樂空寂阿練若處無有惡求亦無所求非有多求正命正行威儀堅固知時隨時常知止足易養易滿堪忍力故心無高下能忍惡罵發心專向善法思惟樂思惟觀及諸禪枝發起慈心入於悲心安住喜心善修捨心正入初禪二禪三禪四禪空處識處無所有處非有想非無想處善能思惟九

次第定是名爲定舉要言之菩薩助定無量
無邊勤行修集是名菩薩定不可盡云何爲
慧是慧修道入於諸法無我無人衆生壽命
如是智慧分別諸陰如幻如化諸界平等入
如空聚分別諸諦皆悉明了隨順觀知十二
因緣分別諸見因果果證所謂分別者於一
切法能得正見如實而見真見空見無相願
見又分別者無分別故分別所謂見者亦無
所見無所別知如是見者爲真實見見真實
者即得方便是菩薩如是慧見不隨無爲修
行諸善心無所住是名爲慧舍利弗是名菩
薩修行定慧而不可盡

復次舍利弗菩薩摩訶薩揔持辯才亦不可
盡云何揔持所修善根正念積集所有八萬
四千法聚能正受持不忘不失是名揔持又
復揔持若一切佛所說妙法一切菩薩緣覺
聲聞凡夫衆生音聲善語悉能受持是名揔
持設劫災起捨命餘生菩薩尔時正念揔持
不忘不失如觀掌中阿摩勒果菩薩觀見一
切諸法亦復如是是名揔持云何辯才菩薩
所說無有滯礙所說無任所說無斷所說通
利所說喜豫所說捷疾如是所說皆是先業
清淨果報諸佛護念諸天攝受說無錯謬功
不唐捐進向涅槃菩薩成就如是辯才所有

色像及衆生類辯才應機不豫思惟不豫分別善能讚說契經偈頌若至大衆刹利衆婆羅門衆長者衆沙門衆四天王衆三十三天衆魔衆梵衆在在處處自然能知衆生根量以無礙辯而爲說法是菩薩如本喜樂講宣法要終身不斷是名辯才舍利弗是名菩薩揔持辯才亦不可盡

復次舍利弗菩薩摩訶薩撰集四法亦不可盡何等四是菩薩知一切行無常一切行苦一切法無我一切法寂滅涅槃云何無常義無所有是無常義無所破壞是無常義是無常義者即無我義若法無我無能壞者性寂

滅故是名無常義云何苦義無所求故是苦
義愛染盡故是苦義無願故是苦義空無有
故是苦義是名苦義云何無我義畢竟無我
是無我義如無我義即是空義無所有義虛
誑不實義是名無我義云何寂滅涅槃義是
寂滅義非念念滅如非念念滅即是寂滅菩
薩得是無盡智慧知一切法相同於寂滅寂
滅者即是涅槃是名寂滅涅槃義舍利弗是
名菩薩撰集四法而不可盡

復次舍利弗菩薩摩訶薩一道亦不可盡云
何一道菩薩所得真實智慧不從他聞又一
道者菩薩獨一無有伴侶已於阿耨多羅三

藐三菩提能大莊嚴以自力勢精進攝取畢
竟自修不假他作自以因緣勇猛之力建立
如是堅固莊嚴如諸衆生所作善業我亦如
是悉當作之及諸聖人從初發心所作諸行
我亦當行施非我伴我是施伴戒忍精進禪
定智慧非是我伴我是彼伴諸波羅蜜不能
使我而我能使諸波羅蜜一切善根皆亦如
是如是等法雖非我伴我要當行不恃於他
勇猛自力獨行無伴坐於道場金剛座處壞
諸魔衆以一念慧成阿耨多羅三藐三菩提
我當如是覺了分別舍利弗是名菩薩一道
無盡復次舍利弗菩薩摩訶薩所修方便亦

不可盡云何方便是方便見一切法是方便
發起諸法是方便爲菩薩使是方便畢竟分
別是方便無有齊限是方便志意常求出世
之法是方便於布施時即能具足諸波羅蜜
是方便持禁戒時在在處處自在往生是方
便行忍辱時莊嚴自身及菩提道是方便行
精進時心無所住是方便修禪定時無有退
失是方便修行慧時不證無爲是方便修慈
心時愍無力勢是方便修悲心時不厭生死
是方便修喜心時無樂處樂是方便修捨心
時發心修集一切善根是方便修天眼爲
欲成就諸佛眼故是方便修集天耳爲欲成

就諸佛耳故是方便修他心智為得佛智知
諸衆生根量深淺故是方便修宿命智為得
佛智知於三世無罣礙故是方便修集神通
為得諸佛神通力是方便隨衆生心是方便
既自曉了復了衆生是方便能自度已示現
未度而方勤修求於度世是方便已離煩惱
示有煩惱是方便已捨重擔示有重擔是方
便能知根量隨量說法是方便善能誘進鈍
根衆生是方便知時非時是方便知可行道
墮邪衆生安置正道是方便能令量作無量
無量作量是方便令損壞者還復如本是方
便示現勝他是方便示說涅槃有五欲樂是

方便已得解脫示有繫縛是方便處在生死
不墮生死是方便於諸威儀無所專當亦不
退失是方便惟觀衆生不觀持戒及以毀戒
是方便攝諸見緣不生諍競是方便悉是音
聲假名無實是方便常行三界是方便得解
脫相行是方便親近凡夫如親近聖人是方
便不證涅槃常處生死是方便於魔行處顯
大光明無有煩惱是方便一切是一切非一
切是一切舍利弗是名菩薩摩訶薩修行方便亦不
可盡舍利弗是名菩薩摩訶薩八十無盡是
八十無盡悉能含受一切佛法無盡意菩薩
摩訶薩說是法門品時六十七百千衆生未

發心者即發阿耨多羅三藐三菩提心五百
二千菩薩摩訶薩得無生法忍。爾時大眾以
種種華香種種華鬘種種華蓋供養如來及
無盡意。并是經典於上空中有無量天樂自
然出聲。作如是言。諸佛世尊於無量劫所集
阿耨多羅三藐三菩提無盡意菩薩。今於是
大集經中已說其義。若有聞是無盡法門信
解受持讀誦解說。當知是人爲具足無盡法
。爾時世尊以覆肩衣與無盡意。讚言善哉善
哉。大士。快說是義。非但我許十方諸佛亦復
如是。爾時無盡意菩薩摩訶薩兩手捧衣置
自頂上。而白佛言。世尊。諸天世人當視是衣

過於塔想以是如來所受用故。今時多有種種寶衣、種種寶蓋、種種寶幡、種種寶樹、種種寶鬘。從十方世界自然而來，覆無盡意而爲供養。是時寶衣、幡蓋、樹鬘自然演出。如是之言善哉，善哉。善男子，善能說是無盡法門。如汝所說我等所許。今時舍利弗白佛言：世尊，如是寶衣供養之具從何處來？乃出是言。佛告舍利弗：是無盡意菩薩初發阿耨多羅三藐三菩提心時，所化衆生皆於十方已成阿耨多羅三藐三菩提。是彼諸佛正徧知等知恩報恩。故遣是來稱揚讚歎。是無盡意真實功德。并復供養所說經典。今時大衆於無盡

意喜菩薩摩訶薩倍生恭敬尊重讚歎作如是
言我等今者快得大利得見無盡意喜菩薩恭
敬供養尊重讚歎并得聞是無盡法門若有
耳得聞無盡意喜菩薩名字亦得善利何況眼
見兼聞是典

尔時世尊於大衆中間是語已告舍利弗若
有善男子善女人學喜菩薩道於一劫中供養
諸佛學戒威儀以堪忍力盡諸衆生生死苦
際精勤修集如救頭然於諸禪定一心成就
智慧方便若離此經我說是人未能具足六
波羅蜜舍利弗若有善男子善女人聞是經
典信解受持讀誦解義如說修行我說是人

已爲具足諸波羅蜜速得成就阿耨多羅三藐三菩提何以故舍利弗若有菩薩受持此經爲他演說卽爲具足檀那波羅蜜何以故於諸施中法施爲勝初不忘失菩薩之心若持此經卽是持戒故能具足尸羅波羅蜜何以故一切菩薩所學禁戒是經所攝若於此經能堪忍樂一切衆生所不能壞能於是中進修忍辱卽爲具足羸提波羅蜜若是經典勤行轉說身口意業精勤修集卽爲具足毗梨耶波羅蜜若於是經其心寂滅無有散亂一心定意分別法相卽爲具足禪那波羅蜜若於此經自得現智不從他聞得正行智卽

爲具足般若波羅蜜舍利弗若有菩薩勤學
是經若欲具足諸波羅蜜則爲不難舍利弗
若有菩薩學習此經受持讀誦如說修行書
寫經卷當知是人一切佛法已爲在手四大
之性可變今異是菩薩心於阿耨多羅三藐
三菩提不可復轉舍利弗此經典者即是菩
薩不退轉印是故菩薩當求是印若有善男
子善女人親近是印者則爲親近一切佛法
尔時四天王及其眷屬即從座起合掌向佛
白佛言世尊我等四王是佛弟子已得道迹
若有善男子善女人受持是經我等堪任爲
作衛護供給侍使當於是人起如來想何以

故是經典中出諸乘故。今時釋提桓因即從座起，合掌向佛，白佛言：世尊，我數從佛聞，無量無邊百千經典，未曾得聞如是經典。分別深義，世尊在在處處，國土郡縣城邑村落，有說此經者，我躬當與二十三天，故往聽受，并護法師，益其氣力，勇猛精進，正念辯才。今是法師於諸大眾，得無所畏，廣能宣說如是經典。佛言：善哉善哉。憍尸迦，汝欲擁護是說法者，今得勇進，正念辯才，憍尸迦，若欲擁護是說法者，即為擁護諸佛正法。護正法者，則為擁護一切衆生。

今時梵自在天王，合掌長跪前，白佛言：世尊

若是經典流布之處我躬當與其餘梵衆并
諸眷屬捨禪喜樂往詣彼所聽受諮請我往
彼時當現四瑞令其覺知云何爲四一者令
見微妙光明二者得聞殊異之香三者令說
法者得無礙辯及正憶念所說吉祥不失章
句四者令其大衆發善欲心喜樂聽法無有厭
足以是四瑞應知梵天王與其眷屬躬來聽法
今時第六魔王波旬合掌白佛言世尊如是
經典令我勢力一切羸劣何以故若有菩薩
聞是經典受持讀誦爲他廣說當知其入即
爲受記世尊如是菩薩所任之處至諸佛界
當知如佛世尊我今所有憍慢嫉妬貢高之

心以無盡意威德力故皆已摧伏我今當護
如是經典及說法者是經所在流布之處乃至
不起一念之心而作留難何況身往故作因緣
尔時佛告尊者阿難汝從今日當爲正法久
住世故受是經典受持讀誦解說尔時阿難
正服而起偏露右肩右膝著地前白佛言世
尊我今敬奉佛教受持是經但恨不能廣宣
流布如諸菩薩佛告阿難汝且自安今此會
中有諸菩薩摩訶薩等自能護持今此經典
廣宣流布尔時會中有六十億諸菩薩摩訶
薩應護法者即從座起合掌白佛言世尊我
等要當宣傳此經今至十方娑婆世界弥勒

大士自當於中護持是典及說法者世尊若
佛滅後後五百歲若有菩薩聞是經典受持
讀誦當知皆是弥勒神力之所建立尔時佛
讚護法菩薩摩訶薩衆善哉善哉諸善男子
汝等不但今於我前護持正法亦曾護持過
去恒沙諸佛正法

尔時無盡意菩薩摩訶薩白佛言世尊我今
自以少智慧分說是經典文字句義必不具
足今於佛前及無盡法所可成就諸菩薩等
懺悔過失佛告無盡意菩薩善男子若有菩
薩得四無礙智凡所講說無有錯謬如是菩
薩得真空義分別法門乃能宣說如是經典

善男子汝今已到第一之處成就四辯自在
無礙是大乘經不從他聞而能分別善男子
汝今成就如是任位身口意業無有錯謬何
以故菩薩所修三業成就常以智慧為根本
故善男子已有無量百千萬億諸佛世尊皆
共稱揚聽汝所說無盡意汝本已於我所及
諸佛所畢竟懺悔無有漏失亦時尊者阿難
白佛言世尊此經何名云何奉持佛告阿難
此經名無盡意所說不可盡義章句之門又
名大集當如是奉持阿難汝應信受如是經
典何以故汝受是已所得持念倍前千數若
為他說則立佛事佛說是已無盡意菩薩摩

訶薩尊者阿難舍利弗諸天龍神乾闥婆阿
脩羅等一切大衆莫不歡喜作禮而去

無盡意菩薩經卷第四

沮壞上才及憤上俱及撰集上仕及選擇上思及

猪飼順良壽附

